

SLUŽBENI GLASNIK B O S N E I H E R C E G O V I N E



Godina VI - Broj 20

Subota, 3. augusta 2002. godine
S A R A J E V O

ISSN 1512-7486
Bosanski jezik

PARLAMENTARNA SKUPŠTINA BOSNE I HERCEGOVINE

177

U skladu s članom II.1., članom IV.1., 2. i 4.a) i članom V.1.a) Ustava Bosne i Hercegovine i članom V. Aneksa 3. (Sporazum o izborima) Općeg okvirnog sporazuma za mir u Bosni i Hercegovini s ciljem promoviranja slobodnih, fer i demokratskih izbora kojima se osigurava ostvarivanje demokratskih ciljeva, Parlamentarna skupština Bosne i Hercegovine, na sjednici Predstavničkog doma, održanoj 3. jula 2002. godine, i na sjednici Doma naroda, održanoj 25. juna i 9. jula 2002. godine, usvojila je

ZAKON

O IZMJENAMA I DOPUNAMA IZBORNOG ZAKONA BOSNE I HERCEGOVINE

Član 1.

U Izbornom zakonu Bosne i Hercegovine ("Službeni glasnik BiH", broj 23/01) i Zakonu o izmjenama i dopunama Izbornog zakona Bosne i Hercegovine ("Službeni glasnik BiH", br. 7/02 i 9/02), vrše se sljedeće izmjene i dopune.

Član 2.

U članu 1.8, stav 4., riječi: "predsjednik i potpredsjednik Federacije Bosne i Hercegovine" i "predsjednik i potpredsjednik Republike Srpske", zamjenjuju se riječima: "predsjednik i potpredsjednici Federacije Bosne i Hercegovine" i "predsjednik i potpredsjednici Republike Srpske".

Član 3.

U članu 1.14, iza stava 2., dodaje se novi stav 3. koji glasi:

"Bez obzira na rok od najmanje sto sedamdeset (170) dana, koji je utvrđen u prethodnom stavu ovog člana, za obavijest koju Izborna komisija Bosne i Hercegovine treba dati svim nadležnim organima vlasti na svim novoima o tome kada će se izbori održati, ovaj rok za prve izbore koji se trebaju održati u skladu s odredbama ovog Izbornog zakona bit će najmanje sto šezdeset devet (169) dana prije datuma održavanja izbora."

Postojeći stav 3. postaje stav 4.

Član 4.

U članu 4.19, dodaje se novi stav 5. koji glasi:

"Na kandidacijskim listama za Predstavnički dom Parlamenta Federacije Bosne i Hercegovine, predsjednika i potpredsjednika Republike Srpske, te Narodnu skupštinu

Republike Srpske, navodi se kojem konstitutivnom narodu, ili grupi ostalih, su se kandidati izjasnili da pripadaju."

Postojeći stav 5. postaje stav 6.

Član 5.

Nakon POGLAVLJA 9. dodaje se novo poglavlje 9A koje glasi:

"POGLAVLJE 9A

PREDSJEDNIK I POTPREDSJEDNIK

FEDERACIJE BOSNE I HERCEGOVINE

Član 9.13

Pri izboru predsjednika i potpredsjednika Federacije BiH, najmanje jedna trećina delegata klubova zastupnika konstitutivnih naroda u Domu naroda Parlamenta Federacije predlaže kandidate za mjesta predsjednika i potpredsjednika Federacije.

Član 9.14

Iz reda kandidata iz člana 9.13 ovog zakona formiraju se zajedničke liste kandidata za mjesta predsjednika i potpredsjednika Federacije BiH.

Predstavnički dom Parlamenta Federacije BiH glasa o jednoj ili više zajedničkih listi koju sačinjavaju tri kandidata, uključujući po jednog kandidata iz svakog konstitutivnog naroda. Lista koja dobije većinu glasova u Predstavničkom domu Parlamenta Federacije BiH bit će izabrana ukoliko dobije većinu glasova u Domu naroda, uključujući i većinu glasova klubova poslanika svakog konstitutivnog naroda.

Član 9.15

U slučaju da zajednička lista prezentirana od strane Predstavničkog doma ne dobije potrebnu većinu u Domu naroda, ova procedura će se ponoviti. Ukoliko, u ponovljenoj proceduri, zajednička lista koja dobije većinu glasova u Predstavničkom domu bude ponovno odbijena u Domu naroda, ta zajednička lista smatrat će se izabranom.

Član 9.16

Delegati u Domu naroda Parlamenta Federacije Bosne i Hercegovine iz reda ostalih mogu učestvovati u izboru kandidata za predsjednika i potpredsjednika. Međutim, ovom prilikom se neće formirati bilo kakav klub zastupnika ostalih i njihov se glas neće računati pri računanju određene većine u klubovima zastupnika konstitutivnih naroda.

Član 9.17

Mandat predsjednika i potpredsjednika traje četiri (4) godine, pod uslovom da taj mandat ne ističe ranije."

Član 6.

U članu 10.1, stav 1., riječi: "sto četrdeset (140) poslanika" se brišu, a dodaju se riječi: "devedeset osam (98) poslanika".

Član 7.

U članu 10.1 dodaje se novi stav 3. koji glasi:

"Najmanje četiri (4) člana svakog konstitutivnog naroda bit će zastupljeno u Predstavničkom domu Parlamenta Federacije."

Postojeći stav 3. postaje stav 4.

Član 8.

U članu 10.2, stav 2., riječi: "sto četrdeset (140) mandata" se brišu, a dodaju se riječi: "devedeset osam (98) mandata".

Član 9.

U članu 10.2, stav 3, riječi: "minimalan broj članova višečlanih izbornih jedinica je četiri (4)" se brišu, a dodaju se riječi: "minimalan broj članova višečlanih izbornih jedinica je tri (3)".

Član 10.

U članu 10.6, dodaju se novi st. 2. i 3. koji glase:

"Ukoliko svaki od konstitutivnih naroda ne osvoji minimalan broj od četiri (4) mandata, naknadni kompenzacijski mandat(i) se dodjeljuje(u) kandidatu(ima) relevantnog(ih) naroda sa kompenzacijske liste političke stranke ili koalicije koja je osvojila najveći broj glasova i koja na listi ima još kvalificiranih kandidata iz reda relevantnog konstitutivnog naroda.

Ukoliko politička stranka ili koalicija na svojoj kompenzacijskoj listi nema dovoljno kvalificiranih kandidata iz reda relevantnog konstitutivnog naroda da popuni mjesta koja su joj dodijeljena, mandat se prenosi na listu stranke ili koalicije koja je osvojila najveći broj glasova i koja ima još takvih kandidata na svojoj kompenzacijskoj listi(ama). Ukoliko na bilo kojoj kompenzacijskoj listi nema kandidata iz reda relevantnog konstitutivnog(ih) naroda, mjesto(a) na listu stranke ili koalicije koja je osvojila najveći broj glasova i koja ima još takvih kandidata na drugoj(im) listi(ama), u skladu sa članom 9.9, stav 2. ovog zakona."

Član 11.

Iza člana 10.8, dodaje se novi član 10.8A koji glasi:

"Član 10.8A

Pri raspodjeli mandata kako bi se popunili mandati koji su prestali u skladu s članom 1.10 ovog zakona, osigurava se minimalna zastupljenost od četiri (4) člana iz reda svakog konstitutivnog naroda.

Sljedeća pravila primjenjivat će se i ista derogiraju rješenja predviđena u čl. 9.10 i 9.11 ovog zakona svaki put kada bi primjena ovih članova svela zastupljenost jednog konstitutivnog naroda ispod minimuma određenog u članu 10.1 ovog zakona:

1. Ako mandat izabranog nezavisnog kandidata prestane, u skladu s članom 10.8 ovog zakona, njegov zamjenik preuzima mandat tog nezavisnog kandidata, pod uslovom da njegov zamjenik dolazi iz reda istog konstitutivnog naroda kao i taj nezavisni kandidat.

Ukoliko zamjenik ne dolazi iz reda istog konstitutivnog naroda, upražnjeno mjesto popunit će se iz reda političke stranke ili koalicije koja je osvojila najveći broj glasova u istoj izbornoj jedinici i koja, u skladu s članom 9.9, stav 2. ovog zakona na svojoj listi ima još kvalificiranih kandidata iz reda relevantnog konstitutivnog naroda.

Ukoliko politička stranka ili koalicija nema dovoljno kvalificiranih kandidata na listi u istoj izbornoj jedinici da popuni mjesta koja su joj dodijeljena, mandat se prenosi na listu stranke ili koalicije koja je osvojila najveći broj glasova i koja na svojoj listi(ama) ima još takvih kandidata u bilo

kojoj drugoj izbornoj jedinici u skladu s članom 9.9, stav 2. ovog zakona.

2. Ako mandat izabranog kandidata političke stranke ili koalicije prestane, mandat se dodjeljuje sljedećem kandidatu sa liste iste izborne jedinice koji pripada istom konstitutivnom narodu kao i prvobitni kandidat, u skladu s članom 9.9, stav 2. ovog zakona.

U slučaju da nema preostalih kandidata na listi iste izborne jedinice koji pripadaju istom konstitutivnom narodu, mandat se dodjeljuje listi iste političke stranke ili koalicije u drugoj izbornoj jedinici koja je osvojila najveći broj glasova, u skladu s članom 9.9, stav 2. ovog zakona.

Ukoliko nema preostalih kandidata na listama bilo koje političke stranke ili koalicije, mandat se dodjeljuje političkoj stranci ili koaliciji iz iste izborne jedinice koja je osvojila najveći broj glasova i koja ima kvalificiranog(ne) kandidata(e) koji pripada(ju) istom konstitutivnom narodu kao i prvobitni kandidat sa njene liste, u skladu s članom 9.9, stav 2. ovog zakona.

Ukoliko nema preostalih kandidata iz iste izborne jedinice koji pripadaju istom konstitutivnom narodu kao i prvobitni kandidat, mandat se dodjeljuje političkoj stranci ili koaliciji u bilo kojoj izbornoj jedinici, koja je osvojila najveći broj glasova i ima kvalificirane kandidate koji pripadaju tom konstitutivnom narodu u skladu s članom 9.9, stav 2. ovog zakona.

3. Ako kompenzacijski mandat izabranog kandidata političke stranke ili koalicije prestane, mandat se dodjeljuje kandidatu sa iste liste kompenzacijskih mandata koji pripada istom konstitutivnom narodu, u skladu s članom 9.8 ovog zakona.

U slučaju da nema preostalih kvalificiranih kandidata koji pripadaju istom konstitutivnom narodu na istoj listi kompenzacijskih mandata, mandat se dodjeljuje stranci ili koaliciji koja je osvojila najveći broj glasova i koja ima kvalificiranog kandidata iz reda istog konstitutivnog naroda na svojoj listi kompenzacijskih mandata. Mandat se tada dodjeljuje u skladu s članom 9.8 ovog zakona."

Član 12.

U POGLAVLJU 10. iza Potpoglavlja A dodaje se novo Potpoglavlje B koje glasi:

"Potpoglavlje B - DOM NARODA PARLAMENTA
FEDERACIJE BOSNE I HERCEGOVINE

Član 10.10

Kantonalna zakonodavna tijela biraju pedeset osam (58) delegata u Dom naroda, sedamnaest (17) iz reda bošnjačkog, sedamnaest (17) iz reda srpskog, sedamnaest (17) iz reda hrvatskog naroda i sedam (7) iz reda "ostalnih".

Član 10.11

Predstavnici iz reda bošnjačkog, hrvatskog, srpskog naroda i reda ostalih u svakoj skupštini kantona biraju delegate iz svog konstitutivnog naroda u tom kantonu.

Svaka stranka koja je zastupljena u odgovarajućim klubovima konstitutivnih naroda i ostalih ili svaki član jednog od tih klubova ima pravo nominirati jednog ili više kandidata na listi za izbor delegata tog određenog kluba iz tog kantona.

Svaka lista može sadržavati više kandidata od broja delegata koji se biraju, pod uslovom da zakonodavno tijelo kantona ima veći broj delegata iz reda bošnjačkog, hrvatskog, srpskog naroda i ostalih, od broja delegata iz reda bošnjačkog, hrvatskog, srpskog naroda i "ostalnih" koji se biraju u Dom naroda.

Član 10.12

Broj delegata iz svakog konstitutivnog naroda i iz reda ostalih, koji se biraju u Dom naroda iz zakonodavnog tijela svakog kantona je proporcionalan broju stanovnika kantona prema posljednjem popisu. Izborna komisija određuje, nakon svakog popisa, broj delegata koji se biraju iz svakog

konstitutivnog naroda i iz reda ostalih, a koji se biraju iz zakonodavnog tijela svakog kantona.

Za svaki kanton, broj stanovnika iz svakog konstitutivnog naroda i iz reda ostalih se dijeli brojevima 1, 3, 5, 7, itd. sve dok je to potrebno za raspodjelu. Brojevi koji se dobiju kao rezultat ovih dijeljenja predstavljaju količnike svakog konstitutivnog naroda i ostalih u svakom kantonu. Svi količnici konstitutivnih naroda se redaju zasebno po veličini tako što se najveći količnik svakog konstitutivnog naroda i iz reda ostalih stavlja na prvo mjesto. Svakom konstitutivnom narodu se daju tri mjesta u svakom kantonu. Najveći količnik za svaki konstitutivni narod u svakom kantonu se briše sa liste količnika tog konstitutivnog naroda. Preostala mjesta se daju konstitutivnim narodima i ostalim, jedno po jedno, od najvećeg prema najmanjem prema preostalim količnicima na listi.

Član 10.13

Izbor delegata u Dom naroda Parlamenta Federacije Bosne i Hercegovine se vrši odmah po sazivanju kantonalne skupštine nakon izbora za kantonalne skupštine, a najkasnije mjesec dana nakon ovjere izbora u skladu s članom 5.29 ovog zakona.

Član 10.14

Svaki delegat u kantonalnoj skupštini daje jedan glas za listu na kojoj je njegov odgovarajući klub.

Izbor se vrši tajnim glasanjem.

Član 10.15

Rezultat glasanja se dostavlja Izornoj komisiji Bosne i Hercegovine za konačnu raspodjelu mjesta. Mandati se raspodjeljuju jedan po jedan po listama ili kandidatu sa najvišim količnicima koji su rezultirali iz formule za proporcionalnu raspodjelu utvrđenu u članu 9.6 ovog zakona. Kada lista dobije mandat, mandat se raspoređuje s vrha liste.

Član 10.16

Kada se ne izabere potreban broj delegata koji se biraju u Dom naroda iz reda svakog konstitutivnog naroda ili iz reda ostalih u datom zakonodavnom tijelu kantona, preostali broj delegata iz reda bošnjačkog, hrvatskog i srpskog naroda ili ostalih bira se iz drugog kantona, dok se ne izabere potreban broj delegata iz reda svakog konstitutivnog naroda.

Izborna komisija Bosne i Hercegovine vrši ponovnu raspodjelu mjesta koja se ne mogu popuniti iz jednog kantona odmah po završetku prvog kruga izbora delegata u Dom naroda u svim kantonima. Izborna komisija vrši preraspodjelu tog mjesta neizabranom kandidatu koji ima najviši količnik na svim listama koje se kandidiraju za odgovarajući konstitutivni narod ili za grupu ostalih u svim kantonima.

Član 10.17

Ukoliko neko mjesto ostane upražnjeno usljed smrti, ostavke ili trajne onesposobljenosti delegata u Domu naroda Parlamenta Federacije Bosne i Hercegovine, to mjesto popunjava sljedeći kvalificirani kandidat na istoj listi na kojoj je bio delegat koji je umro, dao ostavku ili je trajno onesposobljen.

Ukoliko na listi nema preostalih kandidata, mandat se dodjeljuje neizabranom kandidatu sa najvišim količnikom s druge liste koji se kandidira za odgovarajući konstitutivni narod ili za grupu ostalih u istom kantonu.

Ukoliko nema takvog kandidata, Izborna komisija Bosne i Hercegovine vrši preraspodjelu tog mjesta u skladu s članom 5. stav 2. ovog zakona.

Član 10.18

Mandat delegata Doma naroda Parlamenta Federacije Bosne i Hercegovine traje četiri (4) godine.

U slučaju raspuštanja kantonalne skupštine, mandati delegata koje je imenovala ta kantonalna skupština ističu po imenovanju novih delegata koje bira nova kantonalna skupština nakon novih izbora. Mandat tih novih delegata traje do narednih redovno zakazanih izbora."

Član 13.

U članu 11.1, iza stava 1. dodaje se novi stav 2. koji glasi: "Najmanje četiri (4) člana svakog konstitutivnog naroda bit će zastupljeno u Narodnoj skupštini Republike Srpske."

Postojeći st. 2. i 3. postaju st. 3. i 4.

Član 14.

U članu 11.6, iza stava 1. dodaju se novi st. 2. i 3. koji glase:

"Ukoliko svaki od konstitutivnih naroda ne osvoji minimalan broj od četiri (4) mandata, naknadni kompenzacijski mandat(i) dodjeljuje(u) se kandidatu(ima) relevantnog(ih) konstitutivnog(ih) naroda sa kompenzacijske liste političke stranke ili koalicije koja je osvojila najveći broj glasova i koja na listi ima još kvalificiranih kandidata iz reda relevantnog konstitutivnog naroda.

Ukoliko politička stranka ili koalicija na svojoj kompenzacijskoj listi nema dovoljno kvalificiranih kandidata iz reda relevantnog konstitutivnog naroda da popuni mjesta koja su joj dodijeljena, tada se mandat prenosi na listu stranke ili koalicije koja je osvojila najveći broj glasova i koja ima još takvih kandidata na svojoj kompenzacijskoj listi(ama). Ukoliko na bilo kojoj kompenzacijskoj listi nema kandidata iz reda relevantnog konstitutivnog(ih) naroda, mjesto(a) se prenosi(e) na listu stranke ili koalicije koja je osvojila najveći broj glasova i koja ima još takvih kandidata na drugoj(im) listi(ama), u skladu s članom 9.9, stav 2. ovog zakona".

Član 15.

Iza člana 11.8, dodaje se novi član 11.8A koji glasi:

"Član 11.8A

Pri raspodjeli mandata kako bi se popunili mandati koji su prestali u skladu s članom 1.10 ovog zakona, osigurava se minimalna zastupljenost od četiri (4) člana iz reda svakog konstitutivnog naroda.

Sljedeća pravila primjenjivat će se i ista derogiraju rješenja predviđena u čl. 9.10 i 9.11 ovog zakona svaki put kada bi primjena ovih članova svela zastupljenost jednog konstitutivnog naroda ispod minimuma određenog u članu 10.1 ovog zakona:

1. Ako mandat izabranog nezavisnog kandidata prestane, u skladu s članom 11.8 ovog zakona, njegov zamjenik preuzima mandat tog nezavisnog kandidata, pod uslovom da njegov zamjenik dolazi iz reda istog konstitutivnog naroda kao i taj nezavisni kandidat.

Ukoliko zamjenik ne dolazi iz reda istog konstitutivnog naroda, upražnjeno mjesto popunit će se iz reda političke stranke ili koalicije koja je osvojila najveći broj glasova u istoj izornoj jedinici i koja, u skladu s članom 9.9, stav 2. ovog zakona, na svojoj listi ima još kvalificiranih kandidata iz reda relevantnog konstitutivnog naroda.

Ukoliko politička stranka ili koalicija nema dovoljno kvalificiranih kandidata na listi u istoj izornoj jedinici da popuni mjesta koja su joj dodijeljena, mandat se prenosi na listu stranke ili koalicije koja je osvojila najveći broj glasova i koja na svojoj listi(ama) ima još takvih kandidata u bilo kojoj drugoj izornoj jedinici, u skladu s članom 9.9, stav 2. ovog zakona.

2. Ako mandat izabranog kandidata političke stranke ili koalicije prestane, mandat se dodjeljuje sljedećem kandidatu sa liste iste izborne jedinice koji pripada istom konstitutivnom narodu kao i prvobitni kandidat, u skladu s članom 9.9, stav 2. ovog zakona.

U slučaju da nema preostalih kandidata na listi iste izborne jedinice koji pripadaju istom konstitutivnom narodu, mandat se dodjeljuje listi iste političke stranke ili koalicije u drugoj izornoj jedinici koja je osvojila najveći broj glasova, u skladu s članom 9.9, stav 2. ovog zakona.

Ukoliko nema preostalih kandidata na listama bilo koje političke stranke ili koalicije, mandat se dodjeljuje političkoj stranci ili koaliciji iz iste izborne jedinice koja je

osvojila najveći broj glasova i koja ima kvalificiranog(ne) kandidata(e) koji pripada(ju) istom konstitutivnom narodu kao i prvobitni kandidat sa njene liste, u skladu s članom 9.9, stav 2. ovog zakona.

Ukoliko nema preostalih kandidata iz iste izborne jedinice koji pripadaju istom konstitutivnom narodu kao i prvobitni kandidat, mandat se dodjeljuje političkoj stranci ili koaliciji u bilo kojoj izbornoj jedinici, koja je osvojila najveći broj glasova i ima kvalificirane kandidate koji pripadaju tom konstitutivnom narodu, u skladu s članom 9.9, stav 2. ovog zakona.

3. Ako kompenzacijski mandat izabranog kandidata političke stranke ili koalicije prestane, mandat se dodjeljuje kandidatu sa iste liste kompenzacijskih mandata koji pripada istom konstitutivnom narodu, u skladu s članom 9.8 ovog zakona.

U slučaju da nema preostalih kvalificiranih kandidata koji pripadaju istom konstitutivnom narodu na istoj listi kompenzacijskih mandata, mandat se dodjeljuje stranci ili koaliciji koja je osvojila najveći broj glasova i koja ima kvalificiranog kandidata iz reda istog konstitutivnog naroda na svojoj listi kompenzacijskih mandata. Mandat se tada dodjeljuje u skladu s članom 9.8 ovog zakona."

Član 16.

Nakon POGLAVLJA 11. dodaje se novo Poglavlje 11. A koje glasi:

"POGLAVLJE 11.A IZBOR DELEGATA U VIJEĆE NARODA REPUBLIKE SRPSKE

Potpoglavlje A VIJEĆE NARODA REPUBLIKE SRPSKE

Član 11.10

Sastav Vijeća naroda zasniva se na paritetu tako da svaki konstitutivni narod ima isti broj predstavnika.

Vijeće naroda sastoji se od osam (8) pripadnika iz reda svakog od konstitutivnih naroda i četiri (4) pripadnika iz reda ostalih.

Član 11.11

Članove Vijeća naroda bira odgovarajući klub delegata u Narodnoj skupštini.

U slučaju da je broj članova koji se biraju u jedan klub delegata Vijeća naroda veći od broja predstavnika u odgovarajućem klubu delegata Narodne skupštine, bira se dodatni broj delegata od strane kluba delegata koji se u tu svrhu uspostavlja iz reda svih odbornika pripadnika odgovarajućeg konstitutivnog naroda u skupštinama općina u Republici Srpskoj.

Član 11.12

Svaka politička stranka zastupljena u klubovima delegata odgovarajućih konstitutivnih naroda i ostalih ili svaki član jednog od ovih klubova delegata, uključujući i *ad hoc* članove izabrane u skladu s članom 2., stav 2., ima pravo da predloži jednog ili više kandidata na listi za izbor delegata tog relevantnog kluba delegata.

Svaka lista može sadržati više kandidata od broja delegata koji se bira.

Kandidati ne mogu biti poslanici u Narodnoj skupštini ili odbornici u skupštini općine.

Svaki poslanik u Narodnoj skupštini jednom glasa za listu unutar svog kluba delegata.

Glasanje se provodi tajnim glasanjem.

Član 11.13

Rezultati glasanja saopštavaju se Izornoj komisiji u svrhu konačne dodjele mjesta.

Mandati se, jedan po jedan, raspodjeljuju na liste ili kandidatu sa najvećim količnicima koji proizilaze iz formule

proporcionalne raspodjele predviđene u članu 9.6 Izbornog zakona Bosne i Hercegovine. Kada jedna lista osvoji mandat, taj mandat se dodjeljuje s vrha liste.

Član 11.14

Ukoliko postoji upražnjeno mjesto zbog smrti, ostavke, ili trajne spriječenosti delegata u Vijeću naroda Republike Srpske, to upražnjeno mjesto popunjava se sljedećim kvalificiranim kandidatom sa iste liste sa koje dolazi delegat koji je umro, dao ostavku, ili je trajno spriječen.

Ukoliko nema preostalih kandidata na toj listi, tada se mandat dodjeljuje neizabranom kandidatu sa najvećim količnikom sa druge liste koji se kandiduje za odgovarajući konstitutivni narod ili za ostale.

Ukoliko nema takvog kandidata, organizuju se novi izbori za odgovarajući konstitutivni narod u skladu s čl. 11.3 i 11.4 ovog zakona.

Član 11.15

Izbor delegata u Vijeće naroda Republike Srpske održava se čim se sazove Narodna skupština a najkasnije mjesec dana nakon potvrde rezultata u skladu s članom 5.29 ovog zakona.

Član 11.16

Mandat delegata u Vijeću naroda Republike Srpske traje četiri (4) godine, pod uslovom da taj mandat ne ističe ranije.

Kao rezultat skraćivanja mandata Narodne skupštine i raspuštanja Narodne skupštine, prestaje mandat Vijeća naroda."

Član 17.

Nakon POGLAVLJA 11.A dodaje se novo Poglavlje 12. koje glasi:

"POGLAVLJE 12 PREDSJEDNIK I POTPREDSJEDNICI REPUBLIKE SRPSKE

Član 12.1.

Predsjednika i dva (2) potpredsjednika Republike Srpske, koji se neposredno biraju sa teritorije Republike Srpske, biraju birači registrirani da glasaju u Republici Srpskoj.

Član 12.2

Birač registriran da glasa za predsjednika Republike Srpske može glasati samo za jednog kandidata.

Član 12.3.

Bira se kandidat iz reda svakog konstitutivnog naroda koji dobije najveći broj glasova. Između ta tri (3) kandidata, po jedan iz svakog konstitutivnog naroda, za predsjednika se bira kandidat koji dobije najveći broj glasova, a dva kandidata koji se po broju osvojenih glasova nalaze na drugom i trećem mjestu biraju se za potpredsjednike.

Član 12.4

Mandat predsjednika i potpredsjednika Republike Srpske traje četiri (4) godine."

Član 18.

Postojeća poglavlja 12., 13., 14., 15., 16., 17. i 18. postaju poglavlja 13., 14., 15., 16., 17., 18. i 19.

Član 19.

Iza člana 18.9. dodaju se dva nova člana 18.9A i 18.9B, koji s obzirom na prenumeraciju u skladu s članom 18. ovih izmjena i dopuna postaju članovi 19.9A i 19.9B, koji glase:

"Član 19.9A

Do okončanja mandata Visokog predstavnika odnosno sve dotle dok Visoki predstavnik drugačije ne odluči, na snazi će biti isključenja navedena u sljedeća četiri stava:

Nijedna osoba koju je Privremena izborna komisija ili Izborna apelaciona potkomisija smijenila zbog toga što je osobno ometala provedbu Općeg okvirnog sporazuma za mir u Bosni i Hercegovini ili djelovala u suprotnosti s Pravilima i propisima Privremene izborne komisije, ne može se kandidirati na izborima,

obavljati mandat na koji je izabrana niti obavljati imenovanu dužnost.

Nijedna osoba koju je Visoki predstavnik razriješio javne dužnosti, ne može se kandidirati na izborima, obavljati mandat na koji je izabrana niti obavljati imenovanu dužnost.

Nijedan bivši ili sadašnji vojni funkcioner koji je smijenjen na osnovu odredbi Glave 14. Uputstva stranama koja je donio COMSFOR u skladu s članom VI. stav 5. Aneksa 1. A Općeg okvirnog sporazuma za mir u Bosni i Hercegovini, ne može se kandidirati na izborima, obavljati mandat na koji je izabran niti obavljati imenovanu dužnost.

Nijedna osoba koju je Komesar IPTF-a isključio ili smijenio zbog ometanja provedbe Općeg okvirnog sporazuma za mir u Bosni i Hercegovini, ne može se kandidirati na izborima, obavljati mandat na koji je izabrana niti obavljati imenovanu dužnost.

Član 19.9B

Do okončanja mandata Visokog predstavnika odnosno sve dotle dok Visoki predstavnik drugačije ne odluči, Izborna komisija će osigurati da se u zahtjevu za ovjeru bilo koje političke stranke i svoj ostaloj dokumentaciji koja je podnesena u skladu s članom 4.3 ovog zakona, te u skladu s internim propisima Izborne komisije, ne navodi osoba iz člana 19.9A, st. 2. i 3.

Ukoliko se u dokumentima iz stava 1. ovog člana pokaže da takva osoba zauzima centralni položaj u stranci, ta politička stranka neće ispuniti uslove za ovjeru."

Član 20.

Član 18.12, koji je, u skladu s članom 18. ovih izmjena i dopuna, postao član 19.12, mijenja se i glasi:

"Član 19.12

Izbor predsjednika i potpredsjednika Republike Srpske, predsjednika i potpredsjednika Federacije Bosne i Hercegovine, izbor delegata u Vijeće naroda Republike Srpske, te izbor delegata u Dom naroda Parlamenta Federacije Bosne i Hercegovine, regulirat će se na način koji je u skladu s ustavima entiteta."

Član 21.

Član 18.13, koji je, u skladu s članom 18. ovih izmjena i dopuna postao član 19.13, mijenja se i glasi:

"Član 19.13

Ako entiteti, u skladu s članom 19.11 ovog zakona nisu osnovali višečlane izborne jedinice do 31. decembra 2001. godine, sljedeće višečlane izborne jedinice važe za izbore koji će se održati 2002. godine.

Od devedeset osam (98) članova Predstavničkog doma Parlamenta Federacije Bosne i Hercegovine, koje neposredno biraju birači registrirani za glasanje za teritoriju Federacije Bosne i Hercegovine, sedamdeset tri (73) se bira iz dvanaest (12) višečlanih izbornih jedinica, a dvadeset pet (25) su kompenzacijski mandati izabrani s teritorije Federacije Bosne i Hercegovine u cjelini. Ovi mandati se raspodjeljuju u skladu s čl. 9.6 do 9.9 ovog zakona.

Sedamdeset tri (73) mandata iz višečlanih izbornih jedinica za Predstavnički dom Parlamenta Federacije Bosne i Hercegovine raspodjeljuje se na sljedeći način:

Izborna jedinica 1 sastoji se od Kantona 1 i bira devet (9) članova.

Izborna jedinica 2 sastoji se od Kantona 2, dijela Kantona 3 (Gradačac, Gračanica, Doboj-Istok), te birača iz Brčko Distrikta registriranih za glasanje u Federaciji Bosne i Hercegovine, bira pet (5) članova.

Izborna jedinica 3 sastoji se od dijela Kantona 3 (Lukavac, Srebrenik, Tuzla, Čelić) i bira sedam (7) članova.

Izborna jedinica 4 sastoji se od dijela Kantona 3 (Teočak, Banovići, Živinice, Kalesija, Sapna i Kladanj) i bira četiri (4) člana.

Izborna jedinica 5 sastoji se od dijela Kantona 4 (Doboj-Jug, Tešanj, Maglaj, Zepče, Zavidovići, Zenica i Usora) i bira osam (8) članova.

Izborna jedinica 6 sastoji se od dijela Kantona 4 (Kakanj, Vareš, Olovo, Visoko i Breza) i bira četiri (4) člana.

Izborna jedinica 7 sastoji se od Kantona 5 i dijela Kantona 9 (Novi Grad-Sarajevo, Ilidža, Hadžići i Trnovo) i bira šest (6) članova.

Izborna jedinica 8 sastoji se od Kantona 6 i bira devet (9) članova.

Izborna jedinica 9 sastoji se od Kantona 7 i bira osam (8) članova.

Izborna jedinica 10 sastoji se od Kantona 8 i bira tri (3) člana.

Izborna jedinica 11 sastoji se od dijela Kantona 9 (Ilijaš, Vogošća, Centar-Sarajevo, Stari Grad-Sarajevo, Novo Sarajevo) i bira sedam (7) članova.

Izborna jedinica 12 sastoji se od Kantona 10 i bira tri (3) člana.

Od osamdeset tri (83) člana Narodne skupštine Republike Srpske, koje neposredno biraju birači registrirani za glasanje za teritoriju Republike Srpske, šezdeset dva (62) bira se iz šest (6) višečlanih izbornih jedinica, a dvadeset jedan (21) su kompenzacijski mandati izabrani sa teritorije Republike Srpske u cjelini. Ovi mandati raspodjeljuju se u skladu s čl. 9.6 do 9.9 ovog zakona.

Šezdeset dva (62) mandata iz višečlanih izbornih jedinica Narodne skupštine Republike Srpske raspodjeljuje se na sljedeći način:

Izborna jedinica 1 sastoji se od općina: Bosanska Krupa/Krupa na Uni, Bosanski Novi/Novi Grad, Bosanska Dubica/Kozarska Dubica, Prijedor, Bosanska Gradiška/Gradiška, Laktaši, Srbac, Prnjavor, Sanski Most/Srpski Sanski Most i Kostajnica i bira trinaest (13) članova.

Izborna jedinica 2 sastoji se od općina: Bosanski Petrovac/Petrovac, Banja Luka, Čelinac, Drvar/Srpski Drvar, Ključ/Ribnik, Mrkonjić Grad, Jajce/Jezero, Skender Vakuf /Kneževo, Kotor Varoš, Šipovo i Kupres/Srpski Kupres i bira dvanaest (12) članova.

Izborna jedinica 3 sastoji se od općina: Derventa, Bosanski Brod/Srpski Brod, Odžak/Vukosavlje, Modriča, Doboj, Gračanica/Petrovo i Teslić i bira deset (10) članova.

Izborna jedinica 4 sastoji se od općina: Bosanski Šamac/Šamac, Orašje/Srpsko Orašje, Gradačac/Pelagicevo, Bijeljina, Lopare, Ugljevik, te birača iz Brčko Distrikta koji su registrirani za glasanje u Republici Srpskoj, i bira devet (9) članova.

Izborna jedinica 5 sastoji se od općina: Kalesija /Osmaci, Zvornik, Šekovići, Vlasenica, Bratunac, Srebrenica, Sokolac, Han Pijesak, Ilidža/Srpska Ilidža, Stari Grad/Srpski Stari Grad, Novo Sarajevo/Srpsko Novo Sarajevo, Trnovo (RS), Pale (RS), Rogatica i Milići i bira jedanaest (11) članova.

Izborna jedinica 6 sastoji se od općina: Višegrad, Mostar/Srpski Mostar, Nevesinje, Kalinovik, Gacko, Foča/Srbijne, Goražde/Srpsko Goražde, Čajniče, Rudo, Sokolac/Berkovići, Ljubinj, Bileća i Trebinje i bira sedam (7) članova."

Član 22.

Iza člana 19.16 dodaje se novi član 19.16 A koji glasi:

"Član 19.16 A

Do potpune provedbe Aneksa 7. Općeg okvirnog sporazuma za mir u Bosni i Hercegovini, raspodjela mjesta po konstitutivnom narodu koja je obično uređena Poglavljem 10., odjeljak A ovog zakona odvija se u skladu s ovim članom.

Do organiziranja novog popisa, kao osnov koristi se popis iz 1991. godine tako da svaki kanton bira sljedeći broj delegata:

- 1) iz zakonodavnog tijela Kantona br. 1, Unsko-sanski kanton, bira se pet (5) delegata, uključujući dva (2) iz reda bošnjačkog, jednog (1) iz reda hrvatskog i dva (2) iz reda srpskog naroda;
- 2) iz zakonodavnog tijela Kantona br. 2, Posavski kanton, biraju se tri (3) delegata, uključujući jednog (1) iz reda bošnjačkog, jednog (1) iz reda hrvatskog i jednog (1) iz reda srpskog naroda;
- 3) iz zakonodavnog tijela Kantona br. 3, Tuzlanski kanton, bira se osam (8) delegata, uključujući tri (3) iz reda bošnjačkog, jednog (1) iz reda hrvatskog, dva (2) iz reda srpskog naroda i dva (2) iz reda ostalih;
- 4) iz zakonodavnog tijela Kantona br. 4, Zeničko-dobojski kanton, bira se osam (8) delegata, uključujući tri (3) iz reda bošnjačkog, dva (2) iz reda hrvatskog, dva (2) iz reda srpskog naroda i jednog (1) iz reda ostalih;
- 5) iz zakonodavnog tijela Kantona br. 5, Bosansko-podrinjski kanton - Goražde, biraju se tri (3) delegata, uključujući jednog (1) iz reda bošnjačkog, jednog (1) iz reda hrvatskog i jednog (1) iz reda srpskog naroda;
- 6) iz zakonodavnog tijela Kantona br. 6, Srednjobosanski kanton, bira se šest (6) delegata, uključujući jednog (1) iz reda bošnjačkog, tri (3) iz reda hrvatskog, jednog (1) iz reda srpskog naroda i jednog (1) iz reda ostalih;
- 7) iz zakonodavnog tijela Kantona br. 7, Hercegovačko-neretvanski kanton, bira se šest (6) delegata, uključujući jednog (1) iz reda bošnjačkog, tri (3) iz reda hrvatskog, jednog (1) iz reda srpskog naroda i jednog (1) iz reda ostalih;
- 8) iz zakonodavnog tijela Kantona br. 8, Zapadnohercegovački kanton, biraju se četiri (4) delegata, uključujući jednog (1) iz reda bošnjačkog, dva (2) iz reda hrvatskog i jednog (1) iz reda srpskog naroda;
- 9) iz zakonodavnog tijela Kantona br. 9, Kanton Sarajevo, bira se jedanaest (11) delegata, uključujući tri (3) iz reda bošnjačkog, jednog (1) iz reda hrvatskog, pet (5) iz reda srpskog naroda i dva (2) iz reda ostalih;
- 10) iz zakonodavnog tijela Kantona br. 10, Hercegovačko-bosanski kanton, biraju se četiri (4) delegata, uključujući jednog (1) iz reda bošnjačkog, dva (2) iz reda hrvatskog i jednog (1) iz reda srpskog naroda."

Član 23.

Ovaj zakon stupa na snagu danom objavljivanja u "Službenom glasniku BiH", a objavit će se u "Službenim novinama Federacije BiH", "Službenom glasniku Republike Srpske" i "Službenom glasniku Brčko Distrikta BiH".

PS BiH broj 72/02
9. jula 2002. godine
Sarajevo

Predsjedavajući Predstavničkog doma Parlamentarne skupštine BiH Mariofil Ljubić, s. r.	Predsjedavajući Doma naroda Parlamentarne skupštine BiH dr. Nikola Špirić, s. r.
---	---

178

Na osnovu člana IV. 4.a) Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma, održanoj 16. jula 2002. godine, i na sjednici Doma naroda, održanoj 18. jula 2002. godine, usvojila je

ZAKON

O OSIGURANJU DEPOZITA U BANKAMA BOSNE I HERCEGOVINE

I - OPĆE ODREDBE

Član 1.

Okvir primjene

Zakon o osiguranju depozita Bosne i Hercegovine (u daljem tekstu: Zakon) regulira osnivanje, status, djelatnost, upravljanje i rukovođenje, ovlaštenja, obaveze i finansiranje Agencije za osiguranje depozita Bosne i Hercegovine (u daljem tekstu: Agencija).

Cilj ovog zakona je da osigura, u okviru ograničenja određenih ovim zakonom, zaštitu depozita fizičkih i pravnih osoba u bankama koje su dobile dozvolu za rad od Agencije za bankarstvo Federacije Bosne i Hercegovine (u daljem tekstu: FBA) ili Agencije za bankarstvo Republike Srpske (u daljem tekstu: RSAB) ili nasljednik(a) ovih agencija.

Član 2.

Definicije

"Agencije za bankarstvo" u smislu ovog zakona predstavljaju FBA ili RSAB ili nasljednik(ci) ovih agencija.

"Fond za osiguranje depozita" (u daljem tekstu: Fond) u smislu ovog zakona je račun Agencije otvoren u skladu sa članom 11. ovog zakona.

"Deponent" u smislu ovog zakona je fizička ili pravna osoba koja ima prikladan depozit u banci članici.

"Prikladan depozit" u smislu ovog zakona je ukupan iznos svih sredstava koji rezultiraju iz depozita, štednih računa ili certifikata banke koje je deponent deponovao u banci članici umanjeno za isključenja iz člana 5. ovog zakona. Prikladni depoziti čine osnovicu za obračun premije osiguranja.

"Entitet" u smislu ovog zakona predstavlja Federacija Bosne i Hercegovine (u daljem tekstu: Federacija) ili Republika Srpska.

"Vladin organ" u smislu ovog zakona je domaći ili strani korisnik vladinih sredstava bez obzira na nivo vlasti, tj. da li se radi o državnom, entitetskom, kantonalskom ili općinskom, kao i svako pravno lice uključujući penzione i zdravstvene fondove, koji su u vlasništvu ili pod kontrolom takvih korisnika vladinih sredstava.

"Grupa" u smislu ovog zakona je grupa preduzeća koja direktno ili indirektno kontroliraju banku članicu kao i supsidijarna osoba ovih preduzeća i banke članice.

"Slučaj osiguranja" u smislu ovog zakona je slučaj koji zahtijeva isplatu osiguranja depozita u skladu s odredbama ovog zakona.

"Osigurani depozit" u smislu ovog zakona je dio (najviše 5.000 KM) prikladnog depozita koji je pokriven osiguranjem putem Fonda za osiguranje depozita.

"Pravna osoba" u smislu ovog zakona je svaka kompanija, preduzeće, udruženje, ustanova ili fondacija registrirana u BiH izuzimajući vladine organe.

"Fizička osoba" u smislu ovog zakona je svaki pojedinac, bez obzira na državljanstvo ili nacionalnost.

"Banka članica" u smislu ovog zakona je banka koja učestvuje u programu osiguranja depozita Bosne i Hercegovine u skladu s odredbama ovog zakona.

"Država" u smislu ovog zakona je Bosna i Hercegovina.

II - OSIGURANJE DEPOZITA

Član 3.

Princip

Agencija osigurava sve prikladne depozite u bankama članicama u Bosni i Hercegovini.